



Број: 05-05-1-4068-2/10
Сарајево, 28. октобар 2010. године

BOSNA I HERCEGOVINA
PARLAMENTARNA SKUPSTINA BOSNE I HERCEGOVINE
SARAJEVO

PRIMLJENO: 28.10.2010			
Organizaciona jedinica	Klasifikaciona oznaka	Radni broj	Broj priloga
0102-02-10		1199/10	

B

**ПАРЛАМЕНТАРНА СКУПШТИНА
БОСНЕ И ХЕРЦЕГОВИНЕ**

**- ПРЕДСТАВНИЧКИ ДОМ
- ДОМ НАРОДА**

Предмет. Сагласност за ратификацију конвенције, тражи се

У складу са чланом 16. Закона о поступку закључивања и извршавања међународних уговора ("Сл. гласник БиХ", бр 29/00), достављамо вам ради давања сагласности за ратификацију:

Европска конвенција о заштити аудиовизуелне баштине – Стразбур, 08.11.2001.

Будући да је Министарство цивилних послова БиХ надлежно за провођење поступка за приступање Босне и Херцеговине овој конвенцији, молимо вас да на састанке ваших комисија, односно сједнице Дома, поред представника Предсједништва БиХ, као предлагача, позовете и представника Министарства који посланицима, односно делегатима може дати све потребне информације о конвенцији.

С поштовањем,

ГЕНЕРАЛНИ СЕКРЕТАР

Ранко Нинковић





MFA-BA-MPP
Broj: 08/1-23-1065-2/10
Datum: 22.10.2010.godine

PREDSJEDNIŠTVO
BOSNE I HERCEGOVINE
SARAJEVO

PRIMLJENO	27.10	10
Organizaciona jedinica		
Organizaciona jedinica		
Dokument broj		
	05	05-1 4063

PREDSJEDNIŠTVO BOSNE I HERCEGOVINE
SARAJEVO

PREDMET: Prijedlog odluke o ratifikaciji Evropske konvencije o zaštiti audiovizuelne baštine, - dostavlja se -

Dostavljamo Prijedlog odluke o ratifikaciji Evropske konvencije o zaštiti audiovizuelne baštine (sačinjena 8. novembra 2001.g. u Strazburu) i kopiju mišljenja Ureda za zakonodavstvo Vijeća ministara Bosne i Hercegovine, akt broj 02-35-833-1/08 od 17. 08. 2010.g.


Predsjedništvo Bosne i Hercegovine je na 52. sjednici, održanoj 11. februara 2009. g, donijelo Odluku broj: 01-011-382-13/09 o pristupanju Bosne i Hercegovine Evropskoj konvenciji o zaštiti audiovizuelne baštine i ovlastilo gđina. Sredoja Novića, ministra civilnih poslova Bosne i Hercegovine da istu potpiše. Konvencija je potpisana u sjedištu Vijeća Evrope u Strazburu 09. aprila 2010.g.

Vijeće ministara Bosne i Hercegovine je na 133. sjednici održanoj 14. 09. 2010.g. utvrdilo Prijedlog odluke o ratifikaciji Konvencije (kopija obavijesti o zaključku VM BiH je u prilogu ovog akta).

Molimo da Predsjedništvo Bosne i Hercegovine, u skladu sa odredbama Zakona o postupku zaključivanja i izvršavanja međunarodnih ugovora ("Službeni glasnik BiH", broj 29/00) provede postupak ratifikacije predmetne konvencije.

S poštovanjem,

Prilog: kao u tekstu



EVROPSKA KONVENCIJA ZA ZAŠTITU AUDIOVIZUELNE BAŠTINE

Uvod

Države članice Vijeća Evrope, ostale države članice Evropske kulturne konvencije i članice Evropske zajednice, potpisnice ove Konvencije

Uzimajući u obzir da je cilj Vijeća Evrope postizanje višeg nivoa zajedništva između članica, osobito s ciljem očuvanja i njegovanja ideala i načela koja su njihova zajednička ostavština,

Uzimajući u obzir da baština Evrope odražava kulturni identitet i raznolikost njezinih naroda,

Uzimajući u obzir da su snimljeni filmski materijali sastavni dio evropske kulturne baštine te da će države preduzeti mjere da osiguraju njihovo očuvanje i zaštitu za buduće naraštaje,

Uzimajući u obzir da su snimljeni filmski materijali oblik kulturnog izražavanja koji odražava savremeno društvo te da su iznimno sredstvo za bilježenje svakodnevnih događaja, temelja naše historije i odraza naše civilizacije,

Svjesne krhkosti snimljenih filmskih materijala i opasnosti koje prijete njihovom opstanku i prenošenju budućnim generacijama,

Naglašavajući važnost preuzetih obaveza stranaka u pogledu očuvanja, restauriranja i stavljanja na raspolaganje ove baštine,

Odlučne da sarađuju i preduzimaju zajedničke akcije s ciljem očuvanja i osiguravanja kontinuiteta audiovizuelne kulturne baštine,

Uzimajući u obzir važeće međunarodne sporazume za zaštitu autorskih prava i srodnih prava,

Uzimajući u obzir aktivnosti ostalih međunarodnih tijela na području zaštite audiovizuelne baštine,

Sporazumjele su se kako slijedi:

Poglavlje I.

Uvod

Član 1.

Cilj Konvencije

Cilj Konvencije je da osigura zaštitu evropske audiovizualne baštine i njezinog uvažavanja kao oblika umjetnosti i zapisa o našoj historiji putem njezinog prikupljanja,

očuvanja i dostupnosti snimljenih materijala za kulturne, naučne i istraživačke svrhe, u javnom interesu.

Član 2.

Definicije

Za svrhe ove Konvencije:

- a) »pokretni slikovni materijal« označava bilo koju grupu pokretnih slika zabilježenih bilo kojim sredstvom i na bilo kojem mediju, sa i bez zvuka, sa sposobnošću prenošenja dojma o kretanju,
- b) »kinematografsko djelo« označava snimljeni materijal bilo koje dužine, osobito umjetnička kinematografska djela, animirane i dokumentarne filmove namjenjene prikazivanju u kinima,
- c) »arhivsko tijelo« odnosi se na bilo koju instituciju koju stranka odredi da provodi funkciju pohranjivanja obaveznog primjerka snimljenog materijala,
- d) »tijelo za dobrovoljno pohranjivanje« odnosi se na bilo koju instituciju koju stranka odredi za tu svrhu.

Član 3.

Područje primjene

- 1) Stranke Konvencije primjenjivat će odredbe ove Konvencije na sva kinematografska djela od dana njezinog stupanja na snagu.
- 2) Prema protokolima izrađenim u skladu s članom 18. ove Konvencije, primjena Konvencije bit će proširena na pokretni slikovni materijal različit od kinematografskih djela, poput televizijskih produkcija.

Član 4.

Autorska prava i srodna prava

Obaveze iz ove Konvencije neće ni na koji način utjecati na odredbe iz međunarodnih ugovora vezanih uz zaštitu autorskih i srodnih prava. Nijedna odredba ove Konvencije ne može se tumačiti u smislu koji bi doveo u sumnju takvu zaštitu.

Poglavlje II.

Obavezna pohrana

Član 5.

Opća obaveza pohrane

1) Svaka će stranka uvesti, putem zakonodavnih ili drugih odgovarajućih sredstava, obavezu pohranjivanja pokretnog slikovnog materijala koji čini dio njezine audiovizualne baštine proizvedene ili stvorene u koprodukciji na državnom području te stranke.

2) Svaka stranka slobodna je osigurati izuzeće od obaveznog pohranjivanja ako je snimljeni materijal zakonski pohranjen u jednoj od ostalih zainteresiranih stranaka.

Član 6.

Imenovanje i zadaće arhivskih tijela

1) Svaka će stranka imenovati jedno ili više arhivskih tijela čija će zadaća biti osiguravanje zaštite, dokumentiranja, restauriranja i dostupnosti radi mogućnosti uvida u pokretni slikovni materijal.

2) Imenovana tijela mogu biti privatna ili javna, pri čemu nijedna fizička ili pravna osoba koja se prvenstveno bavi profitnim djelatnostima na području medija ne može ih ni direktno ni indirektno kontrolirati.

3) Stranke se obavezuju nadgledati izvršavanje zadaća koje su prenijete arhivskim tijelima.

Član 7.

Tehnička i finansijska sredstva

Svaka će stranka osigurati da arhivska tijela imaju potrebna sredstva za izvršavanje svojih zadaća u skladu s članom 6. stavom 1. ove Konvencije.

Član 8.

Uvjeti obavezne pohrane

1) Svaka će stranka imenovati fizičke ili pravne osobe koje će imati obavezu pohranjivati pokretni slikovni materijal. Stranka će osigurati uvjete za ovu pohranu. Naročito će osigurati da arhivska tijela dobiju izvornike pokretnog slikovnog materijala ili materijala iz kojih se može rekonstruirati kvalitet jednak izvornicima.

2) Materijal će biti pohranjen najkasnije u roku od dvanaest mjeseci od prvog javnog prikazivanja konačne verzije ili u bilo kojem drugom razumnom roku koji odredi stranka. Ako pokretni slikovni materijal nije javno prikazan, vremenski rok će početi nakon završetka produkcije.

Član 9.

Restauracija pohranjenog gradiva

- 1) Svaka će stranka poticati i promovirati restauraciju obavezno pohranjenog pokretnog slikovnog materijala koji predstavlja dio njezine audiovizuelne baštine a čiji je fizički kvalitet narušen.
- 2) Svaka stranka može odgovarajućim zakonskim odredbama dopustiti kopiranje obavezno pohranjenog pokretnog slikovnog materijala u svrhu restauracije.

Član 10.

Vanredne mjere

Svaka će stranka poduzeti odgovarajuće mjere kako bi osigurala zaštitu pokretnog slikovnog materijala koji predstavlja dio njezine audiovizualne baštine a koji je izložen prijetećoj opasnosti koja bi mogla ugroziti njegovo materijalno postojanje, ako nije na drugi način zaštićen na temelju uvjeta koji se odnose na obaveznu pohranu.

Poglavlje III.

Dobrovoljna pohrana

Član 11.

Promoviranje dobrovoljne pohrane

Svaka će stranka poticati i promovirati dobrovoljnu pohranu pokretnih slikovnih materijala koji predstavljaju dio njezine audiovizualne baštine, uključujući i prateće materijale koji ne ispunjavaju uvjete iz člana 5. ove Konvencije.

Član 12.

Dostupnost javnosti

Svaka će stranka poticati tijela u kojima se dobrovoljno pohranjuje pokretni slikovni materijal da u ugovorima s nositeljima prava navedu uvjete pod kojima se pokretni slikovni materijal može staviti na uvid javnosti.

Poglavlje IV.

Opće odredbe koje se primjenjuju na arhivska tijela i na tijela za dobrovoljnu pohranu

Član 13.

Zajedničke arhive

- 1) S ciljem što efikasnije realizacije ciljeva ove Konvencije, stranke mogu osnovati zajednička arhivska tijela kao i tijela za dobrovoljnu pohranu.
- 2) Arhivsko tijelo i tijelo za dobrovoljnu pohranu može biti jedna te ista ustanova, pod uvjetom da se primjenjuju odredbe specifične za svaku funkciju.

Član 14.

Saradnja između arhivskih tijela i tijela za dobrovoljnu pohranu
Svaka će stranka poticati svoja arhivska tijela i tijela za dobrovoljnu pohranu na uzajamnu učešće kao i na saradnju s tijelima drugih stranaka radi olakšavanja:

- a) razmjene informacija o snimljenim filmskim materijalima,
- b) popisivanja evropske audiovizualne filmografije,
- c) izrade standardnog postupka za pohranu, prikupljanje i ažuriranje pokretno slikovnog materijala i srodnih informacija,
- d) izrade zajedničkog standarda za elektroničku razmjenu informacija,
- e) zaštite opreme za prikazivanje snimljenog pokretnog slikovnog materijala.

Član 15.

Ugovorni uvjeti pohrane

Svaka će stranka poticati arhivska tijela i tijela za dobrovoljnu pohranu na zaključivanje ugovora s pohraniteljima u kojima će se navesti prava i obaveze u pogledu pohranjenog pokretnog slikovnog materijala. Osim ako nisu regulirani zakonom, takvi ugovori mogu sadržavati uvjete vezane uz odgovornost za bilo kakvu štetu nastalu na pohranjenom materijalu, privremenom ili trajnom povlačenju iz pohrane od strane nositelja prava, kao i naknade koje nositelji prava trebaju platiti za restauriranje ili druge usluge arhivskih tijela ili tijela za dobrovoljnu pohranu.

Poglavlje V

Praćenje primjene Konvencije

Član 16.

Stalni odbor

- 1) Za svrhe primjene Konvencije osnovat će se Stalni odbor.
- 2) Svaka stranka može imati jednog ili više predstavnika u Stalnom odboru. Svaka stranka ima pravo glasa. Svaka država koja je stranka ove Konvencije ima jedan glas. U pogledu pitanja koja su pod njezinom nadležnosti, Evropska zajednica koristit će pravo glasa i imati onoliki broj glasova koliki je broj njezinih država članica stranaka ove Konvencije. Evropska zajednica neće koristiti svoje pravo glasa kada se radi o pitanjima koja ne spadaju pod njezinu nadležnost.
- 3) Evropsku zajednicu ili bilo koju državu navedenu u članu 19. koja nije stranka ove Konvencije, u Stalnom odboru može predstavljati promatrač.

4) Stalni odbor saziva glavni sekretar Vijeća Evrope. Prva sjednica Odbora održat će se u roku od šest mjeseci od stupanja ove Konvencije na snagu. Nakon toga Odbor će se sastajati kadgod jedna trećina stranaka ili Odbor ministara Vijeća Evrope to zatraži ili na inicijativu glavnog tajnika Vijeća Evrope u skladu s odredbama člana 18. stav 2. ili na zahtjev jedne ili više stranaka u skladu s odredbama člana 17. stav 1. c).

5) Za kvorum kod usvajanja odluka, potrebna je prisustvo većine stranaka. U skladu s odredbama člana 16. stav 6. i član 18. stav 3., odluke Stalnog odbora donosit će se dvotrećinskom većinom glasova prisutnih stranaka.

6) Stalni odbor može zatražiti savjet stručnjaka kako bi izvršio svoju funkciju u skladu s ovom Konvencijom. Odbor može na vlastitu inicijativu ili na zahtjev zainteresiranog tijela, pozvati bilo koje međunarodno ili nacionalno, vladino ili nevladino tijelo koje je tehnički kvalificirano na područjima koje pokriva ova Konvencija da uputi svog predstavnika u svojstvu promatrača na sve ili pojedine sjednice Odbora. Odluka o pozivanju takvih stručnjaka ili tijela donosit će se dvotrećinskom većinom glasova stranaka.

7) Stalni će odbor izraditi poslovnik u skladu s odredbama ove Konvencije.

Član 17.

Funkcije i izvještaji Stalnog odbora

1) Stalni odbor odgovoran je za ispitivanje djelovanja i provođenje ove Konvencije. Odbor može:

- a) uputiti preporuke strankama u pogledu primjene ove Konvencije,
- b) predložiti sve potrebne izmjene Konvencije i razmotriti predložene izmjene u skladu s odredbama člana 18.,
- c) istražiti, na zahtjev jedne ili više stranaka, bilo koje pitanje vezano uz tumačenje Konvencije,
- d) dati preporuke Odboru ministara da pozove države, osim onih navedenih u članu 19., da pristupe ovoj Konvenciji.

2) Nakon svake sjednice Stalni će odbor proslijediti strankama i Odboru ministara Vijeća Evrope izvještaj o raspravama i svim odlukama koje su donijete.

Poglavlje VI.

Protokoli i izmjene i dopune

Član 18.

Protokoli i izmjene i dopune

1) Protokoli koji se odnose na pokretni slikovni materijal, osim kinematografskih djela, zaključivat će se s ciljem izrade, u konkretnim područjima, načela sadržanih u ovoj Konvenciji.

2) Svaki prijedlog vezan uz protokol iz stava 1. ili drugi prijedlog o izmjenama i dopunama takvog protokola, ili o izmjenama i dopunama ove Konvencije koji podnese stranka, Stalni odbor ili Odbor ministara proslijedit će glavnom sekretaru Vijeća Evrope koji će ih uputiti državama članicama Vijeća Evrope, ostalim državama koje mogu pristupiti ovoj Konvenciji i Evropskoj zajednici. Glavni sekretar Vijeća Evrope sazvat će sjednicu Stalnog odbora najranije dva mjeseca nakon upućivanja prijedloga.

3) Stalni će odbor prijedlog razmatrati najranije dva mjeseca nakon njegovog upućivanja glavnom sekretaru u skladu sa stavom 2. Stalni će odbor podnijeti tekst odobren tročetvrtinskom većinom glasova stranaka Odboru ministara na usvajanje.

4) Svaka izmjena i dopuna ove Konvencije usvojena u skladu s prethodnim stavom stupit će na snagu tridesetog dana nakon što sve stranke izvijeste glavnog sekretara o prihvaćanju istih. Ako je Odbor ministara usvojio izmjene i dopune ali još nisu stupile na snagu, države ili Evropska zajednica ne mogu se obavezati na uvjete iz Konvencije bez istodobnog prihvaćanja izmjena i dopuna.

5) Odbor ministara će odlučiti o uvjetima stupanja na snagu protokola uz ovu Konvenciju te izmjenama i dopunama tih protokola na temelju teksta koji je predložio Stalni odbor u skladu sa stavom 3.

Poglavlje VII

Završne odredbe

Član 19.

Potpisivanje, ratifikacija, prihvatanje, odobrenje

Ova Konvencija otvorena je za potpisivanje državama članicama Vijeća Evrope, drugim državama potpisnicama Evropske kulturne konvencije i Evropskoj zajednici. Podliježe ratifikaciji, prihvatu ili odobrenju. Isprave o ratifikaciji, prihvatu ili odobrenju polažu se kod glavnog sekretara Vijeća Evrope.

Član 20.

Stupanje na snagu

1) Ova Konvencija stupit će na snagu prvoga dana u mjesecu koji slijedi nakon isteka tromjesečnog perioda od dana kada pet država, uključujući najmanje četiri države članice Vijeća Evrope iskažu svoj pristanak da budu vezane Konvencijom u skladu s odredbama člana 19.

2) Za svaku potpisnicu koja naknadno iskaže svoj pristanak da bude vezana Konvencijom ona stupa na snagu prvoga dana u mjesecu koji slijedi nakon isteka tromjesečnog perioda od dana polaganja njezine isprave o ratifikaciji, prihvatu ili odobrenju.

Član 21.

Odnosi između Konvencije i prava Zajednice

U svojim međusobnim odnosima, stranke Konvencije članice Evropske zajednice pridržavat će se propisa Zajednice i iz tog razloga neće primijeniti pravila koja proistječu iz ove Konvenciji osim u slučajevima kada ne postoji pravilo Zajednice koje se odnosi na konkretno pitanje o kojemu je riječ.

Član 22.

Pristupanje drugih država

1) Nakon što ova Konvencija stupi na snagu, Odbor ministara Vijeća Evrope može, nakon konsultiranja stranaka, pozvati svaku državu na koju se ne odnosi član 19. da pristupi Konvenciji na temelju odluke donošene većinom glasova u skladu s članom 20.d Statuta Vijeća Evrope, te jednoglasnom odlukom predstavnika država ugovornica koje imaju pravo biti u Odboru ministara.

2) Za svaku pristupajuću državu, Konvencija će stupiti na snagu prvoga dana u mjesecu nakon isteka tromjesečnog perioda od dana polaganja isprava o pristupu kod glavnog sekretara Vijeća Evrope

Član 23.

Teritorijalna primjena

1) Svaka država ili Evropska zajednica može, u vrijeme potpisivanja ili polaganja isprave o ratifikaciji, prihvatu, odobrenju ili pristupu, navesti područje ili područja na koje će se ova Konvencija primjenjivati.

2) Svaka stranka može, u bilo koje vrijeme, izjavom upućenom glavnom sekretaru Vijeća Evrope, proširiti primjenu ove Konvencije na bilo koje drugo područje navedeno u izjavi. U odnosu na to područje, Konvencija će stupiti na snagu prvoga dana u mjesecu koji slijedi nakon isteka tromjesečnog perioda od dana kad glavni sekretar primi takvu izjavu.

3) Svaka izjava data na temelju dvaju prethodnih stavki u pogledu bilo kojeg područja označenog u takvoj izjavi, može se povući upućivanjem obavijesti glavnom sekretaru. Povlačenje će stupiti na snagu prvog dana u mjesecu koji slijedi nakon isteka tromjesečnog perioda od dana kad glavni sekretar primi takvu obavijest.

Član 24.

Rezerve

Nikakve se rezerve ne mogu stavljati na odredbe ove Konvencije.

Član 25.

Otkaz

- 1) Svaka stranka može u bilo koje vrijeme otkazati ovu Konvenciju upućivanjem obavijesti glavnom sekretaru Vijeća Evrope.
- 2) Takvo otkazivanje stupit će na snagu prvoga dana u mjesecu koji slijedi nakon isteka šestomjesečnog perioda od dana kada je glavni sekretar zaprimio obavijest.

Član 26.

Notifikacije

Glavni sekretar Vijeća Evrope izvijestit će države članice Vijeća Evrope, ostale države koje mogu postati strankama ove Konvencije i Evropsku zajednicu:

- a) o svakom potpisivanju Konvencije,
- b) o polaganju svake isprave o ratifikaciji, prihvatu, odobrenju ili pristupu,
- c) o svim datumima stupanja na snagu ove Konvencije, u skladu s članovima 20., 22. i 23.,
- d) o svim izmjenama i dopunama ili protokolima usvojenim u skladu s članom 18., te datumu stupanja na snagu takvih izmjena i dopuna ili protokola,
- e) o svakom drugom činu, notifikaciji ili priopćenju u vezi s ovom Konvencijom.

U potvrdu toga su potpisani, propisno za to ovlašteni, potpisali ovu Konvenciju.

Sastavljeno u Strasbourgu, 8. novembra 2001., na engleskom i francuskom jeziku pri čemu su oba teksta jednako vjerodostojna, u jednom primjerku koji će biti pohranjen u arhivi Vijeća Evrope. Glavni sekretar Vijeća Evrope dostavit će ovjerene kopije svakoj državi članici Vijeća Evrope, ostalim državama strankama Evropske kulturne konvencije, Evropskoj zajednici i svim ostalim državama pozvanim da pristupe ovoj Konvenciji.